

Sr. Gino Frans di fundacion ELIZER

Di 35 adicto anual, 25 a cay y 10 a keda bon

ORANJESTAD - E resultado di un programa di rehabilitacion di un adicto no ta facil, e ta un caminda yen di sumpiña, pero si e ta uno hopi satisfactorio. Anualmente fundacion ELIEZER, cu den palabra Hebreo ta nifica "Dios ta yuda", ta yuda 35 persona pa sali for di gara di droga, y actualmente nan tin un lista di spera di 70 persona. E problematica aki ta asina grandi na Aruba cu nunca nan cas no ta bashi. "Un sali awe di biaha un otro ta dreña", segun sr. Gino Frans di e fundacion ELIEZER.

Sr. Frans ta bisa cu di e 35 adicto cu nan ta ricibi pa aña, 25 a cay y 10 a keda bon. Y di e 25 cu a cay, 10 di nan a bolbe bek, kiermen 15 no a kies pa e programa. "Pa nos un persona cu ta cambia ta hopi", segun sr. Frans di fundacion ELIEZER.

Fundacion ELIEZER tin dos aña na Aruba. Anteriormente nan tabata manda nan clientenan pa Colombia caminda nan tin un cas. Pero ultimo tempo e famia di e adictonan tin miedo di manda nan ser keru pa Colombia pa motibo di ordo publico. Sinembargo sr. Frans ta bisa cu e excuus aki no tin peso ya cu caminda nan tin nan finca no ta un luga peligroso. Debi cu tabatin cierto resistencia pa manda e adictonan pa Colombia a dicidi pa fundacion ELIEZER habri su propio cas na Aruba. Nan ta shete persona cu den pasado a yega di cay den adiccion, pero cu a ser rehabilita.

Sr. Gino Frans ta bisa cu e mes tabata un persona adicto na droga pa 12 aña, y actualmente e tin 14 aña liber di droga, y nunca mas e no a bay atras. El a supera su mes. El a haci su studio na Hulanda, el a bira meneer di scol na Hulanda, pero e tabata sinti un bashi grandi.

"Mi no tabata sinti mi bon. Dor cu mi a pasa e bida duro riba caya, mi a mira mi mes, y mi a mira mi amigonan riba caya, y mi conocinan riba caya cu a sigui den asunto di droga", asina el a declara.

E lucha di libera e adictonan for di gara di droga, a nace ora cu e tabata topa nan, y nan a keda impresiona di sr. Gino Frans su rehabilitacion. "Ki ora nan ta wak mi, mi ta impresiona nan, asina ey e obra aki a cuminsa", asina el a relata na BON DIA Aruba.

DIOS TA CLAVE PA REHABILITACION

E palabra clave p'e ta: "Si Dios por a cambia mi, e por cambia bo tambe". Aunke e ta clarifica cu nan no ta forsa niun hende riba e parti religioso of di creencia, ora cu nan ta atende e programa di rehabilitacion di e fundacion ELIEZER. Pero si nan ta treci dilanti cu e parti spiritual ta masha importante pa logra exito riba e trabou di rehabilitacion di un adicto. "Bo por tin bon programa, bo por tin bon guia, pero e parti spiritual bo mester pone den djele. E ora bo ta completo", segun sr. Gino Frans di fundacion ELIEZER.

E ta bisa cu fundacion ELIEZER ta dispuesto pa yuda tur persona cu kier. Tambe e ta haci un yamada na e famia y mayornan di e adictonan ya cu nan kier wak un cambio cerca nan serman keru cu a cay den e problematica di consumo di droga. E tin comprension pa nan, pero ta nan yiu mes ta esun cu mester duna di nan parti. E ta lamenta cu tin biha nan ta wordo mal mira y tilda cu nan no kier yuda e persona, pero e ta bisa cu nan no ta un shelter, ya cu nan ta un cas cu ordo y disciplina.

